



ევროკავშირი
საქართველოსთვის
The European Union for Georgia



ელექტრონული პეტიციის დანერგვა ხონის მუნიციპალიტეტში

სახელმძღვანელო

2021 წელი

მომზადა ელისო ჯიქიაშ
სამოქალაქო საზოგადოების ორგანიზაცია
განათლებისა და განვითარების
ცენტრი „ედელვაისის“ თავმჯდომარე

ს ა რ ჩ ე ვ ი

შესავალი	3
ელექტრონული პეტიცია	4
საერთაშორისო პრაქტიკა	4
საქართველოს მთავრობის პეტიციების სისტემა და სტატისტიკა	5
ადგილობრივ დონეზე პეტიციების წარდგენის საკანონმდებლო ჩარჩო და პრაქტიკა	5
სონის მუნიციპალიტეტში ელექტრონული პეტიციის მექანიზმის ამოქმედების პრაქტიკა	6
დასკვნა	17

პუბლიკაცია შექმნილია ევროკავშირის მხარდაჭერით.
მის შინაარსზე სრულ პასუხისმგებლობას იღებს
კულტურულ-ჰუმანიტარული ფონდი „სოხუმი“
და შესაძლოა, რომ იგი არ გამოხატავდეს
ევროკავშირის შეხედულებებს.

შესავალი

„ევროკავშირი მხარს უჭერს საქართველოს დემოკრატიულ განვითარებას. ასოცირების შესახებ შეთანხმების ხელმოწერის შემდეგ საჯარო მმართველობის რეფორმა (PAR) არის მნიშვნელოვანი ელემენტი საქართველოში დემოკრატიული ცვლილებების შენარჩუნების მიზნით. ეფექტიანი და გამჭვირვალე საჯარო მმართველობის მიღწევა წარმოადგენს რეფორმის ძირითად მიზანს და ის შეთანხმებულია ევროკავშირსა და საქართველოს მთავრობას შორის.

კულტურულ-ჰუმანიტარულმა ფონდმა „სოხუმმა“, მეწარმე ქალთა ფონდთან და იმერეთის მხარის მეცნიერთა კავშირ „სპექტრთან“ პარტნიორობით, ევროკავშირის ფინანსური მხარდაჭერით განახორციელა პროექტი „გურიის, იმერეთისა და რაჭა-ლეჩხუმის სამოქალაქო საზოგადოების ორგანიზაციების საერთო ფორუმი საჯარო მმართველობის რეფორმის საგზაო რუკის მონიტორინგის მიზნით“.

„პროექტის ფარგლებში შეიქმნა დასავლეთ საქართველოს სამოქალაქო ორგანიზაციების საზოგადოების ფორუმი. იმერეთის, რაჭა-ლეჩხუმის და გურიის სამოქალაქო საზოგადოების ორგანიზაციები თანამშრომლობდნენ და მონიტორინგს უწევდნენ საჯარო მმართველობის რეფორმის (PAR) განხორციელებას 8 მუნიციპალიტეტში. შედეგები დაეფუძნა მონიტორინგის მექანიზმს (რომელიც შემუშავებულია ფონდი „სოხუმის“ მიერ) და განსაზღვრავს ადგილობრივი ხელისუფლების ეფექტიანობას, გამჭვირვალობასა და ინკლუზიურობას ხონში, ბაღდათში, თერჯოლაში, ვანში, ოზურგეთში, ლანჩხუთში, ცაგერსა და ამბროლაურში“¹.

ყოველივე ზემოხსენებული განხორციელდა ტრენინგების სერიის საშუალებით, რათა ადგილობრივი სამოქალაქო საზოგადოების ორგანიზაციები აღჭურვილიყვნენ საჭირო კომპეტენციით შესაბამის მუნიციპალიტეტებში აღნიშნული ამოცანების განსახორციელებლად. გარდა ამისა, მომზადდა ადგილობრივი სამოქალაქო საზოგადოების ორგანიზაციების მხარდასაჭერი ქვესაგრანტო სქემა, რომელმაც ხელი შეუწყო ფორუმის წევრი ორგანიზაციების მონაწილეობას სამოქალაქო დიალოგში თავიანთ მუნიციპალიტეტებში და მათ ფარგლებს გარეთ.

ადგილობრივი საჭიროებების შეფასება განხორციელდა პროექტის პირველი და მეორე წლის განმავლობაში, შემუშავდა შესაბამისი რეკომენდაციები, რომლებიც გათვალისწინებულ იქნა სამიზნე მუნიციპალიტეტების ადგილობრივ სამოქმედო გეგმებში. გამოქვეყნდა რეგულარული ანგარიშები საჯარო მმართველობის რეფორმის (PAR) მონიტორინგისა და რეგიონებში მიმდინარე განვითარების შესახებ. ხონის მუნიციპალიტეტში დაინერგა ონლაინ პეტიციების საპილოტე სისტემა, რომელმაც განსაკუთრებული როლი შეასრულა ადგილობრივი თვითმმართველობის გადაწყვეტილების მიღების პროცესში დემოკრატიული პრინციპების გაძლიერების მიმართულებით.

პეტიციის, როგორც ღირებული მექანიზმის, დანერგვის პროცესში ჩაერთნენ ფორუმის წევრები, სამოქალაქო საზოგადოების ადგილობრივი ორგანიზაციები - „დევნილთა საინიციატივო ჯგუფი“ და განათლებისა და განვითარების ცენტრი „ედელვაისი“, ასევე პროექტის ფარგლებში დაფუძნებული ორგანიზაციები: „ახალგაზრდობის ჩართულობის ცენტრი“ და შშმ პირთა ორგანიზაცია „ფენიქსი“.

¹ ფონდი „სოხუმი“ (2021 წლის 25 მაისი), საჯარო მმართველობის რეფორმის (PAR) საგზაო რუკის მონიტორინგი დასავლეთ საქართველოს 8 მუნიციპალიტეტში (მესამე ანგარიში)

ელექტრონული პეტიცია

გადაწყვეტილების მიღების პროცესში მოქალაქეთა ჩართულობის უზრუნველყოფა დემოკრატიული საზოგადოების ერთ-ერთი მთავარი მახასიათებელია. ინოვაციებისა და ტექნოლოგიის განვითარებამ ეს კომპონენტი ელექტრონული კომუნიკაციების გაუმჯობესებას გაუთანაბრა, განსაკუთრებით პანდემიის პირობებში, როდესაც Covid-19-ის გავრცელებით გამოწვეულმა ვითარებამ კიდევ უფრო ნათლად დაგვანახა სახელმწიფო სერვისების ელექტრონული მიწოდების საჭიროება.

მმართველობის პროცესში მოქალაქეთა არასაკმარისი ჩართულობის, აგრეთვე ანგარიშვალდებულების არსებული მექანიზმების სიმცირის გათვალისწინებით, ელექტრონული პეტიცია მოქალაქეთათვის უნიკალურ შესაძლებლობას წარმოადგენს. საზოგადოებისთვის მნიშვნელოვანი საკითხის ირგვლივ მობილიზებით, მოქალაქეები ადგილობრივი ხელისუფლების, მთავრობის პრიორიტეტების განსაზღვრაში უშუალოდ იღებენ მონაწილეობას. პეტიციების არსებობა, ერთი მხრივ, გადაწყვეტილების მიმღებ პირებს ეხმარება, რომ საზოგადოების მიერ შემოთავაზებული ინიციატივებით იხელმძღვანელოს. ხოლო, მეორე მხრივ, მოქალაქეებს უჩნდებათ გადაწყვეტილების მიღების პროცესში აქტიური მონაწილეობის საშუალება.

საჯარო მმართველობის რეფორმის კვალდაკვალ მოქალაქეთა მონაწილეობის მექანიზმების გაძლიერება ერთ-ერთ ფუნდამენტურ ღირებულებას წარმოადგენს. ფონდი „სოხუმი“ მიესალმება მოწინავე ტექნოლოგიებისა და ინოვაციების გამოყენებით, გადაწყვეტილების მიღების პროცესში საზოგადოების ჩართულობის გაძლიერების ნებისმიერ ინსტრუმენტს, მათ შორის ელექტრონულ პეტიციებს.

საერთაშორისო პრაქტიკა

საერთაშორისო დონეზე პეტიციის უფლება დეკლარირებულია, როგორც მოქალაქის ერთ-ერთი ფუნდამენტური უფლება. გარდა ცალკეული ქვეყნებისა, პეტიციის სისტემა ამოქმედებულია საერთაშორისო ორგანიზაციების, მათ შორის ევროკავშირის დონეზეც. ევროპარლამენტის ელექტრონული პორტალის მეშვეობით პეტიციის ელექტრონული ფორმით განთავსება შეუძლია ევროკავშირის ნებისმიერ მოქალაქეს, აგრეთვე ორგანიზაციის ნევრ ქვეყანაში მცხოვრებ პირებსა და იურიდიულ პირებს.

დიდ ბრიტანეთში არსებული პრაქტიკის თანახმად, ელექტრონულ პეტიციაზე მთავრობის ოფიციალური პასუხის მისაღებად საჭიროა 10 000 ხელმოწერის შეგროვება, პარლამენტის მხრიდან კი საკითხი მინიმუმ 10 000 ხელმოწერის შეგროვების შემთხვევაში განიხილება.

ამერიკის შეერთებულ შტატებში მთავრობის მიერ პეტიციის ხელმომწერთა მინიმალური რაოდენობა განსაზღვრულია 10 000-მდე, რაც 30 კალენდარული დღის განმავლობაში უნდა შეგროვდეს. ამასთან, ელექტრონული პეტიცია შესაბამისი ონლაინ პორტალის (We the People) საძიებო სისტემაში იმ შემთხვევაში გამოჩნდება, თუ ინიციატორი 30 დღის განმავლობაში მინიმუმ 150 ხელმოწერას შეაგროვებს. 10 000 ხელმოწერის შეგროვებიდან 60 დღის ვადაში პეტიციას მთავრობის ოფიციალური პასუხიც მოჰყვება.

საქართველოს მთავრობის პეტიციების სისტემა და სტატისტიკა

კვლავ საქართველოს კონტექსტს რომ დავუბრუნდეთ, მთავრობის წინაშე ელექტრონული პეტიციის ინიცირება www.ichange.gov.ge-ის მეშვეობით არის შესაძლებელი და მასზე ხელმოწერის უფლება აქვს საქართველოს ყველა სრულწლოვან მოქალაქეს. შინაარსობრივად, ელექტრონული პეტიცია მხოლოდ მთავრობის კომპეტენციის სფეროში შემავალ საკითხებს ფარავს. 30 კალენდარული დღის ვადაში ხელმომწერთა შესაბამისი რაოდენობის შეგროვების შემდგომ, საზოგადოების მიერ დაყენებულ საკითხს საქართველოს მთავრობის ადმინისტრაციაში შექმნილი ელექტრონული პეტიციის ექსპერტთა კომისია განიხილავს და მხოლოდ მისი დასკვნის საფუძველზე შესაძლოა იქნას ის განხილული მთავრობის სხდომაზე. პეტიციის განსახილველად ხელმომწერთა საჭირო რაოდენობა თავდაპირველად 10 000-მდე განისაზღვრა, თუმცა საქართველოს მთავრობის დადგენილების თანახმად, 2021 წლის 1 იანვრიდან აღნიშნული რაოდენობა 5 000-მდე შემცირდა.

„სამთავრობო პორტალზე, ამ დრომდე, ხელმომწერთა საჭირო რაოდენობა მხოლოდ ერთმა პეტიციამ დააგროვა. შესაბამისად, მხოლოდ ამ შემთხვევაში მოხდა სპეციალური კომისიის მხრიდან მასზე ოფიციალური პასუხის გაცემაც. აღნიშნული გარემოება მოქალაქეთა მონაწილეობის მექანიზმების ირგვლივ საზოგადოების ცნობიერების ამაღლების საჭიროებაზე მიუთითებს, რაც მთავრობის აქტიური მუშაობით უნდა მოხდეს“².

ადგილობრივ დონეზე პეტიციების წარდგენის საკანონმდებლო ჩარჩო და პრაქტიკა

„ადგილობრივი თვითმმართველობის კოდექსის თანახმად, თვითმმართველი ერთეულების საქმიანობაში მოქალაქეთა მონაწილეობის უზრუნველსაყოფად ამოქმედებულია შემდეგი სახის მექანიზმები: დასახლების საერთო კრება, პეტიცია, სამოქალაქო მრჩეველთა საბჭო, საკრებულოს სხდომებში მონაწილეობისა და მერის და საკრებულოს წევრის მიერ გაწეული მუშაობის შესახებ ანგარიშების მოსმენის შესაძლებლობა. გარდა ამისა, მუნიციპალიტეტის ორგანოები ვალდებული არიან, მოქალაქეთა მიღებისა და საჯარო შეხვედრების უზრუნველსაყოფად შესაბამისი პირობები შექმნან.

ზემოთ ჩამოთვლილთაგან ერთ-ერთ უმთავრეს მექანიზმს სწორედ პეტიციის ინიცირების შესაძლებლობა წარმოადგენს. აღსანიშნავია, რომ პეტიციის წარდგენის შესაძლებლობა ადგილობრივ დონეზე გაცილებით ადრე იქნა უზრუნველყოფილი, ვიდრე ცენტრალურ დონეზე. კოდექსის თანახმად, პეტიციის წარდგენის უფლება აქვთ მუნიციპალიტეტის ტერიტორიაზე რეგისტრირებულ ამომრჩეველთა არანაკლებ 1%-ს, ასევე საერთო კრებას. პეტიციის შესაძლო შინაარსს კოდექსი შემდეგნაირად განმარტავს:

- ნორმატიული ადმინისტრაციულ-სამართლებრივი აქტის პროექტი;
- მოსამზადებელი ნორმატიული ადმინისტრაციულ-სამართლებრივი აქტის პროექტის ძირითადი პრინციპები ან კონკრეტული წინადადებები;

2 ინფორმაციის თავისუფლების განვითარების ინსტიტუტი (2021 წლის 12 მარტი), პეტიციების სისტემის მნიშვნელობა მოქალაქეთა მონაწილეობისთვის: საერთაშორისო მაგალითები და საქართველოს პრაქტიკა. თბილისი, ხელმისაწვდომია ბმულზე

<https://idfi.ge/ge/the-importance-of-petition-systems-for-citizen-participation->

- მუნიციპალიტეტისთვის ან/და დასახლებისთვის საერთო მნიშვნელობის პრობლემებიდან გამომდინარე, საკითხების მუნიციპალიტეტის საკრებულოს სხდომაზე შესწავლის, განხილვისა და გადაწყვეტის მოთხოვნა.

აქვე ხაზი უნდა გაესვას შემდეგ გარემოებას: კოდექსი არ განსაზღვრავს პეტიციების ელექტრონული ფორმით წარდგენის წესს, თუმცა მუნიციპალიტეტის საკრებულოს ანიჭებს უფლებამოსილებას, პეტიციის ირგვლივ დადგენილი ნორმების გათვალისწინებით, დადგენილების ფარგლებში, თავად განსაზღვროს პეტიციის ელექტრონული ფორმით წარდგენის წესი. მაგალითისთვის, ხონის მუნიციპალიტეტის საკრებულოს მიღებული აქვს დადგენილება, რომელიც ნორმატიული აქტის პროექტის ელექტრონულად წარდგენის შემთხვევაში, ხელმომწერთა რაოდენობას მუნიციპალიტეტის ტერიტორიაზე რეგისტრირებულ ამომრჩეველთა საერთო რაოდენობის 0.5%-ით განსაზღვრავს³.

ხონის მუნიციპალიტეტში ელექტრონული პეტიციის მექანიზმის ამოქმედების პრაქტიკა

ბოლო წლებში საკანონმდებლო დონეზე პეტიციის, როგორც ჩართულობის მექანიზმის, უზრუნველყოფის მიუხედავად, პრაქტიკამ აჩვენა, რომ ხონის მუნიციპალიტეტში იგი აქტიურად არ გამოიყენება მოქალაქეების მიერ ხელისუფლებისთვის საკუთარი მოსაზრებებისა და შეთავაზებების მისაწოდებლად. 2012 წლიდან დღემდე მუნიციპალიტეტში მხოლოდ ერთი პეტიციაა რეგისტრირებული. აღსანიშნავია ის, რომ პეტიციაზე რეაგირება ყველა წესის დაცვით განხორციელდა და საკითხიც დადებითად არის გადაწყვეტილი. მიუხედავად ამ წარმატებული მაგალითისა, პრაქტიკამ სხვა პრეცედენტებს ვერ დაუდო საფუძველი. ამას რამდენიმე გარემოება განაპირობებდა:

პირველ რიგში, პეტიციების შესაგროვებლად დაწესებული მინიმალური ზღვარი, კანონმდებლობით განსაზღვრული 1%, რაც სოფლად მცხოვრები ადამიანებისათვის საკმაოდ დიდი თავსატეხი იყო. ხონის მუნიციპალიტეტის რეალობაში ეს მინიმალური ზღვარი დაახლოებით 240 რეგისტრირებულ ამომრჩეველს, ანუ ხონში რეგისტრირებულ 240 სრულწლოვან მოქალაქეს გულისხმობდა. ამ რაოდენობის ხელმომწერთა შეგროვება, მაგალითად, მთიან ზონაში, მცირე-დასახლებიან სოფლებში საკმაოდ რთულია და პრობლემური იყო.

მეორე მნიშვნელოვანი გარემოება: მუნიციპალიტეტში არ არსებობდა პეტიციის ელექტრონულად წარდგენის მექანიზმი. პროცედურას საკმაოდ ართულებდა ე.წ. ხელზე წარდგენის პრაქტიკა. ინიციატორს უნდა მიემართა მერიის ადმინისტრაციული სამსახურისთვის, გაეტანა სპეციალურად შედგენილი ოქმის ფორმა, შემდგომ შევსებული და ხელმოწერილი დოკუმენტი უნდა დაერეგისტრირებინა მერიაში განცხადების ფორმით, რაც ადმინისტრაციულ ორგანოში რამდენიმე ვიზიტთან ერთად, კარდაკარ სიარულს, საკმაოდ ბევრს შრომას და დამღლელ პროცედურებს მოიცავდა.

მესამე ძალიან მნიშვნელოვანი გარემოება ეს არის მოსახლეობის ინფორმირებულობა. სამწუხაროდ, ადმინისტრაციული ორგანოს მხრიდან მხოლოდ იმის გაჟღერება და განმარტე-

³ საქართველოს საკანონმდებლო მაცნე (2014 წლის 5 თებერვალი), ადგილობრივი თვითმმართველობის კოდექსი, თბილისი

ბა, რომ კანონმდებლობით არსებობს მოქალაქეთა ჩართულობის მექანიზმები, მათ შორის „პეტიცია“, საკმარისი არ არის მოქალაქეებისათვის, რომ დაინტერესდნენ, გამოიყენონ, ისარგებლონ. საჭიროა ფართომასშტაბიანი საინფორმაციო კამპანია პეტიციის წარდგენის უფლებისა და გამოყენებისათვის. ასევე ნდობის გაზრდისთვის, აუცილებელია საინფორმაციო კამპანიაში გადანაცვეტილების მიმღები პირების ჩართულობა, რაც პრაქტიკაში არ იყო დანერგილი.

მეოთხე გარემოება და უმნიშვნელოვანესი ფაქტორია საჯარო დაწესებულებების ანგარიშვალდებულება და გამჭვირვალობა, რაშიც მოიაზრება წარდგენილი და დაკმაყოფილებული პეტიციების შესახებ ინფორმაციის პროაქტიული ხელმისაწვდომობა, წარმატებული პეტიციების განხილვის პროცესის ღიაობა და საბოლოო გადანაცვეტილების დასაბუთება, ასევე, პეტიციების განხილვის პროცესის განჭვრეტადობა და მათი ზედმინევნით მიყოლა შესაბამისი უწყებების მიერ.

და ეს ყველაფერი, რა თქმა უნდა, ადგილობრივი ხელისუფლების მხრიდან ადმინისტრირებას, კონკრეტულ ღონისძიებებს, აქტივობებს, კამპანიებს გულისხმობს, რაც დიდწილად როგორც ადამიანურ, ისე ფინანსურ რესურსებთან არის დაკავშირებული. ამ პროცესში ძალიან მნიშვნელოვანია პარტნიორი, გამოცდილი ორგანიზაციების რეკომენდაციები, საუკეთესო პრაქტიკის გაცნობა-გაზიარება-დანერგვა, გრანტების მოძიება-მოზიდვა.

თანამშრომლობის

დასაწყისი

ხონის მუნიციპალიტეტის

ადგილობრივ

თვითმმართველობასთან



თითოეული გარემოების შესრულების შემთხვევაში კარგი შედეგის მიღწევა შესაძლებელია.

აქვე საუკეთესო პრაქტიკა განვიხილოთ ხონის მუნიციპალიტეტის მაგალითზე:

2020 წლის დასაწყისში ხონის მუნიციპალიტეტის საკრებულოს სააქტო დარბაზში ფონდი „სოხუმის“ წარმომადგენლებმა გამართეს პროექტის „გურიის, იმერეთისა და რაჭა-ლეჩხუმის სამოქალაქო საზოგადოების ორგანიზაციების საერთო ფორუმი საჯარო მმართველობის რეფორმის საგზაო რუკის მონიტორინგის მიზნით“ პრეზენტაცია. პრეზენტაციას მუნიციპალიტეტის ხელმძღვანელი პირებიც ესწრებოდნენ და იმთავითვე გამოხატეს მზადყოფნა თანამშრომლობისათვის.

პროექტის ერთ-ერთი კომპონენტი სწორედ გადაწყვეტილების მიღების პროცესში მოქალაქეთა ჩართულობის გააქტიურება იყო. პროექტისადმი ადგილობრივი ხელისუფლების პოზიტიურმა და სწორმა დამოკიდებულებამ განსაზღვრა ის, რომ მოქალაქეთა ჩართულობის უზრუნველყოფის კომპონენტში ხონი საპილოტე მუნიციპალიტეტად შეირჩა. გაფორმდა თანამშრომლობის მემორანდუმი საკრებულოსთან და მერიასთან და ხონის მუნიციპალიტეტმა საკმაოდ მნიშვნელოვან პროცესში შეიძინა პარტნიორი ორგანიზაციები ფონდი „სოხუმის“, მენარმე ქალთა ფონდის და იმერეთის მხარის მეცნიერთა კავშირ „სპექტრის“ სახით, ასევე ფინანსური მხარდაჭერი - ევროკავშირი.

გარდა ამისა, ხელისუფლებამ კიდევ ერთი მემორანდუმით (01.04.2021- 30.09.2021) გაამყარა ფონდ „სოხუმთან“ თანამშრომლობა. ამჯერად ელექტრონულ პეტიციასთან მიმართებაში მხარეებმა აიღეს ვალდებულება, რომ კეთილსინდისიერად შეასრულონ მემორანდუმის პირობები და შექმნან სათანადო გარემო სამუშაო პროცესის წარმატებით წარმართვისთვის და, საჭიროების შემთხვევაში, მიზნის მისაღწევად დაგეგმონ ერთობლივი ღონისძიებები.

ადგილობრივმა ხელისუფლებამ არასამთავრობო სექტორთან თანამშრომლობით აიღო პასუხისმგებლობა, რომ მოქალაქეთა ჩართულობის მექანიზმი - „პეტიცია“ - ხონში რეალურად ამოქმედებულიყო.

პირველი პრაქტიკული ნაბიჯი, რომელიც ამ მიმართულებით ხონში გადაიდგა, იყო კანონმდებლობით განსაზღვრული პეტიციაზე ხელის მომწერთა მინიმალური ზღვარის - 1%-ის განახევრება. მუნიციპალიტეტის მერმა საკრებულოს მიმართა ინიციატივით არგუმენტირებულად, არსებული ზღვარის განახევრების შესახებ. საკრებულომ წესების დაცვით ვადებში ერთხმად დაუჭირა მხარი ინიციატივას და პეტიციაზე ხელმომწერთა მინიმალური ზღვარი ხონის მუნიციპალიტეტში განისაზღვრა 0,5%-ით.

დღის წესრიგში დადგა პეტიციის მექანიზმის პროცედურული გამარტივების კიდევ ერთი საკითხი: ელექტრონული პეტიციის დანერგვა, რომ მოქალაქეებს გამარტივებოდათ ხმების შეგროვების პროცესი, გაზრდილიყო მათი ხელმისაწვდომობა ამ მექანიზმზე. მერიის ადმინისტრაციულმა სამსახურმა გამოთქვა მზაობა ვებგვერდის განახლებისა და საჭირო ტექნიკური ღონისძიებების გასატარებლად. პარტნიორი ორგანიზაციების ფინანსური მხარდაჭერით მუნიციპალიტეტის ოფიციალურ ვებგვერდზე ჩაშენდა პეტიციის ელექტრონული აპლიკაცია (იხ. <http://khoni.gov.ge/>), გადამზადდა მერიისა და საკრებულოს IT და საზოგადოებასთან ურთიერთობის სპეციალისტები, მერიისა და საკრებულოს ადმინისტრაციული სამსახურების ხელმძღვანელები.

მაგალითისთვის:

როგორ შევავსოთ ელექტრონული პეტიცია?

- პეტიცია არის ადგილობრივი თვითმმართველობის განხორციელებაში მოქალაქეთა მონაწილეობის ფორმა. პეტიციის სახით შეიძლება წარდგენილ იქნას:
 - ა) საკრებულოს დადგენილების პროექტი;
 - ბ) საკრებულოს დადგენილების პროექტის ძირითადი პრინციპები ან კონკრეტული წინადადებები;
 - გ) მუნიციპალიტეტისთვის ან/და დასახლების საერთო პრობლემიდან გამომდინარე, საერთო საკითხების მუნიციპალიტეტის საკრებულოს სხდომაზე შესწავლის, განხილვისა და გადაწყვეტილების მოთხოვნა.

ვის აქვს ელექტრონული პეტიციის წარდგენის უფლება?

- ელექტრონული პეტიციის წარდგენის უფლება აქვს ხონის მუნიციპალიტეტის ტერიტორიაზე რეგისტრირებულ ამომრჩეველთა არანაკლებ 0,5% პროცენტს (120 ამომრჩეველი).

რა არის საჭირო ელექტრონული პეტიციის შესატანად?

- საკრებულოსათვის ელექტრონული პეტიციის წარდგენა შესაძლებელია ელექტრონული ფორმით, მუნიციპალიტეტის საკრებულოს ვებგვერდის სპეციალური პროგრამული უზრუნველყოფის მეშვეობით.
- ელექტრონული სახით პეტიციის ავტორი უნდა დარეგისტრირდეს აპლიკაციის მომხმარებლად, რისთვისაც მიუთითებს სახელს, გვარს, დაბადების თარიღს, პირად ნომერს, ელექტრონული ფოსტის მისამართს და აპლიკაციაში განათავსებს საქართველოს მოქალაქის პირადობის მოწმობის (პასპორტის) სკანირებულ ასლს.
- პეტიციის ავტორს ელექტრონულ ფოსტაზე აპლიკაციის მიერ ავტომატურად ეგზავნება კოდური სიტყვა/სიმბოლოები, რომლის დადასტურების შემდეგ ავტორი კოდური სიტყვით/სიმბოლოებით ახდენს რეგისტრაციის დადასტურებას.
- რეგისტრაციის გავლის შემდეგ ავტორმა პეტიციის ტექსტი ქართული Sylfaen შრიფტით უნდა განათავსოს აპლიკაციაში და დოკუმენტის ატვირთვის გზით, თან დაურთოს:
 1. ინფორმაცია პეტიციის წარმდგენი სუბიექტის არანაკლებ ერთი და არაუმეტეს 3 მომხსენებლის შესახებ: სახელი, გვარი, მისამართი, საკონტაქტო ტელეფონის ნომერი, ელექტრონული ფოსტის მისამართი და საქართველოს პირადობის დამადასტურებელი ასლ(ებ)ი;
 2. ნორმატიულ-ადმინისტრაციული სამართლებრივი აქტის პროექტის ან - მოსამზადებელი ნორმატიული ადმინისტრაციულ-სამართლებრივი აქტის პროექტის ძირითად პრინციპები ან კონკრეტულ წინადადებები; ან - კონკრეტულად ჩამოყალიბებული და დასაბუთებული მოთხოვნა;
 3. დოკუმენტები და მასალები, რომლებიც პეტიციის წარმდგენ სუბიექტს პეტიციის დასასაბუთებლად მიაჩნია საჭიროდ.

- განთავსებული ტექსტი და თანდართული დოკუმენტები მუნიციპალიტეტის საკრებულოს ვებგვერდზე გამოჩნდება ატვირთვის დღის მომდევნო სამუშაო დღის 24 საათამდე.
- აპლიკაციაში განთავსებული ტექსტის და თანდართული დოკუმენტების მუნიციპალიტეტის საკრებულოს ვებგვერდზე ატვირთვის დასტური მომხსენებელს ეგზავნება ელექტრონულ ფოსტაზე.

ინსტრუქცია

- პეტიციის ტექსტი მუნიციპალიტეტის საკრებულოს ვებგვერდზე არ აისახება, თუ:
 1. ტექსტი ეწინააღმდეგება ზნეობის საყოველთაოდ აღიარებულ ნორმებსა და პრინციპებს;
 2. ტექსტის შინაარსი შეურაცხყოფას აყენებს ნებისმიერ პირს;
 3. ტექსტის შინაარსი ზღუდავს საქართველოს კონსტიტუციის მე-2 თავით განსაზღვრულ ადამიანის ძირითად უფლებებსა და თავისუფლებებს.

როგორ მოვაწყოთ ხალი პეტიციას?

- პეტიციაზე ხელმოწერის დასაფიქსირებლად, მუნიციპალიტეტის ამომრჩეველმა აპლიკაციაში ქართული Sylfaen შრიფტით უნდა ჩაწეროს საკუთარი სახელი, გვარი, პირადი ნომერი, რეგისტრაციის მიხედვით საცხოვრებელი ადგილის მისამართი.
- პეტიციაზე ხელმოწერის დასაფიქსირებლად, ამომრჩეველი ვალდებულია, აპლიკაციის შესაბამის ფანჯარაში მონიშვნის გზით დაადასტუროს, რომ გაეცნო პეტიციის შინაარსს და ეთანხმება მას.
- ხელმოწერის შესრულებისას ამომრჩეველი თუ არ არის თანახმა, რომ მისი სახელი და გვარი საჯარო გახდეს, აპლიკაცია უზრუნველყოფს მის დაცვას პერსონალური მონაცემების გამხელისგან. ამისათვის შესაბამის ფანჯარაში ამომრჩეველმა მხოლოდ მონიშვნა უნდა გააკეთოს.
- ამომრჩევლის პერსონალური მონაცემები ხელმისაწვდომი იქნება მხოლოდ მომხსენებლისა და ხონის მუნიციპალიტეტის საკრებულოს აპარატის უფლებამოსილი პირისთვის.
- პეტიციის ტექსტის გამოქვეყნების შემდეგ აპლიკაცია ასაჯაროებს პეტიციაზე ხელისმომწერი ამომრჩევლების მიმდინარე რაოდენობას, პეტიციაზე საჭირო ხელმომწერთა მინიმალურ რაოდენობას და პეტიციის ავტორ(ებ)ის სახელ(ებ)სა და გვარ(ებ)ს.

პეტიციის რეგისტრაცია

- მუნიციპალიტეტის საკრებულოს ვებგვერდზე პეტიციის ტექსტის გამოქვეყნებიდან არაუმეტეს 30 დღის ვადაში საჭირო ოდენობის ხელმოწერების ელექტრონულად განხორციელების შემდეგ, აპლიკაციის „რეგისტრაციაზე გაგზავნის“ ფუნქციის მეშვეობით მომხსენებელი მუნიციპალიტეტის საკრებულოს თავმჯდომარის სახელზე პეტიციის ტექსტს და თანდართულ დოკუმენტებს, მათ შორის პეტიციის ხელმომწერ ამომრჩეველთა სრულ სიას, აგზავნის მუნიციპალიტეტის ელექტრონული ფოსტის მისამართზე.
- აპლიკაცია ავტომატურ რეჟიმში აღნიშნავს პეტიციის წარდგენის თარიღს და საკრებულოს აპარატისაგან ითხოვს პეტიციის მიღების დადასტურებას.
- საკრებულოს აპარატისაგან მიღების დადასტურების შემდგომ აპლიკაცია ავტომატურ რე-

ჟიმში ელექტრონულად ატყობინებს ამის შესახებ მომხსენებელს თარიღისა და დროის მითითებით.

- პეტიციის ელექტრონულ ფოსტაზე მიღებიდან 3 სამუშაო დღის ვადაში საკრებულოს აპარატი იწყებს პეტიციის რეგისტრაციას.
- პეტიციის რეგისტრაციის შემდეგ საკრებულოს აპარატი პეტიციის რეგისტრაციის მონაწილას ან პეტიციის რეგისტრაციაზე უარს უგზავნის მომხსენებლებს და აღნიშნულს განათავსებს მუნიციპალიტეტის საკრებულოს ვებგვერდზე.
- პეტიცია იწერება და შეიტანება ხონის მუნიციპალიტეტის საკრებულოს თავმჯდომარის სახელზე.

ასევე პროექტისა და თანამშრომლობის ფარგლებში, პარტნიორმა ორგანიზაციებმა უზრუნველყვეს მიზანმიმართული და კონკრეტული საინფორმაციო კამპანიის წარმოება მუნიციპალიტეტის თორმეტივე ადმინისტრაციულ ერთეულში. მუნიციპალიტეტში შეიქმნა საინიციატივო ჯგუფი, შეირჩა 6 აქტორი, რომელთა გადამზადების შემდეგ (სპეციალურად მათთვის ჩატარდა ტრენინგი ელექტრონული პეტიციის მართვის საკითხებზე) დაიგეგმა კონკრეტული საინფორმაციო შეხვედრები სოფლად და ქალაქად. საინფორმაციო კამპანიაში ჩართულნი იყვნენ ადგილობრივი ხელისუფლების წარმომადგენლები, მათ შორის ხელმძღვანელი პირები, რომლებიც არწმუნებდნენ მოსახლეობას გადანაცვეტილების მიღების პროცესში მათი ჩართულობის აუცილებლობასა და მნიშვნელობაში.

მომზადდა
საინფორმაციო
ფურცელი,
რომელზეც
მოცემული იყო
პეტიციის
შევსავის წესი

ხონის მუნიციპალიტეტში ინიციატივითი პეტიციის სისტემა დაინერგა

1. შესვლა ხონის მუნიციპალიტეტის ოფიციალურ გვერდზე <http://khoni.gov.ge>

2. პეტიციის ფანჯრის გახსნა <http://petition.lsg.ge/khoni/>

3. ზედა მარჯვენა კუთხეში - შესვლა და ავტორიზაცია.

4. ავტორს ელექტრონულ ფოსტაზე ეგზავნება კოდური სიტყვა/სიმბოლოები და ადასტურებს რეგისტრაციას.

5. ავტორმა პეტიციის ტექსტი ქართული Syllable შრიფტით უნდა განათავსოს და დაურთოს საჭირო დოკუმენტები.

დეტალური ინფორმაცია - ინსტრუქცია განთავსებულია ვებგვერდზე <http://petition.lsg.ge/khoni/>

ელექტრონული პეტიციის შევსება ხდება ასე:

1. შესვლა ხონის მუნიციპალიტეტის ოფიციალურ გვერდზე <http://khoni.gov.ge>

2. პეტიციის ფანჯრის გახსნა <http://petition.lsg.ge/khoni/>


3. ზედა მარჯვენა კუთხეში - შესვლა და ავტორიზაცია.

4. ავტორს ელექტრონულ ფოსტაზე ეგზავნება კოდური სიტყვა/სიმბოლოები და ადასტურებს რეგისტრაციას.

5. ავტორმა პეტიციის ტექსტი ქართული Syllable შრიფტით უნდა განათავსოს და დაურთოს საჭირო დოკუმენტები.

დეტალური ინფორმაცია - ინსტრუქცია განთავსებულია ვებგვერდზე <http://petition.lsg.ge/khoni/>

შეხვედრებზე მოსახლეობას მიეწოდებოდა
ინფორმაცია, როგორც პეტიციის არსის,
ისა მისი მნიშვნელობის და გამოყენების
ფორმების შესახებ. აღბილზე ხდებოდა
პრობლემათა იდენტიფიცირება და წარდგენის,
ხმის მიცემისა და გადაგზავნის
პრაქტიკული გაკვეთილების ჩვენება.





მაგალითისათვის:

საინფორმაციო შეხვედრის დროს გორდისა და კინჩხის ადმინისტრაციულ ერთეულებში მოსახლეობის მიერ იდენტიფიცირდა და პრიორიტეტი მიენიჭა შემდეგ პრობლემებს:

1. შიდა საუბნო გზების მოხრეშვა კოპიისა და მაჭაკეთის უბნებში
2. საბავშვო ატრაქციონის განთავსება სოფელ გორდში
3. სკვერის რეაბილიტაცია სოფელ კინჩხის ცენტრში
4. სკვერის რეაბილიტაცია სოფელ ქვედა კინჩხაში

იქვე მომზადდა პეტიციის ტექსტები და აიტვირთა მუნიციპალიტეტის ოფიციალური ვებგვერდის <http://khoni.gov.ge/> შესაბამის „ფანჯარაში“ <http://petition.lsg.ge/khoni/>.



იხ. პეტიციის ტექსტების ფორმა და შინაარსი

სკვერის რეაბილიტაცია სოფელ კინჩხის ცენტრში

სოფელი კინჩხა ხონის მუნიციპალიტეტში ერთ-ერთი ლამაზი სოფელია. ბუნებრივი ძეგლებით მდიდარი კინჩხა ტურისტულად ძალიან მიმზიდველი სოფელია ქვეყნის მასშტაბით და მას ყოველწლიურად ათასობით ვიზიტორი სტუმრობს.

სოფლის ცენტრში, მთავარი ტურისტული გზის მიმდებარედ სკვერია, რომელიც რეაბილიტაციასა და განახლებას საჭიროებს. სკვერი ფუნქციურად დატვირთულია და აქაური ახალგაზრდებისა თუ მოსული სტუმრების საყვარელი ადგილია. მიუხედავად იმისა, რომ თითქმის იავარქმნილია. სკვერი საჭიროებს შემორაგვას, სკამებისა და ელექტრონათურების დამონტაჟებას.

გთხოვთ, აღნიშნული საკითხი საჯაროდ განიხილეთ საკრებულოს სხდომაზე და მიიღეთ შესაბამისი გადაწყვეტილება.

სკვერის რეაბილიტაცია სოფელ ქვედა კინჩხაში

სოფელი კინჩხა ხონის მუნიციპალიტეტში ერთ-ერთი ლამაზი სოფელია. ბუნებრივი ძეგლებით მდიდარი კინჩხა ტურისტულად ძალიან მიმზიდველი სოფელია ქვეყნის მასშტაბით და მას ყოველწლიურად ათასობით ვიზიტორი სტუმრობს.

სოფელი რამდენიმე უბნისგან შედგება. მათ შორის არის ქვედა კინჩხა, სოფლის ცენტრისგან საკმაოდ მოშორებული უბანი. განსხვავებით სხვა უბნებისგან, ქვედა კინჩხაში არ არის თავშეყრის არცერთი ადგილი, სადაც ადგილობრივი თუ სტუმრად მოსული ახალგაზრდები გართობისა და დასვენების მიზნით შეიკრიბებიან. ადგილობრივების თხოვნაა, რომ უბნის ცენტრში, სკვერისთვის განკუთვნილი ადგილი შემოირაგვოს და კეთილმოეწყოს შეძლებისდაგვარად.

გთხოვთ, აღნიშნული საკითხი საჯაროდ განიხილეთ საკრებულოს სხდომაზე და მიიღეთ მოსახლეობის მოთხოვნის შესაბამისი გადაწყვეტილება.

საუზნო გზავის მოწესრიგება მაჭაკეთისა და კოპიაში

სოფელ გორდში მაჭაკეთისა და კოპიის უბნების მოსახლეობას, წლებია, უგზოობა აწუხებს. შიდა საუზნო, სოფლის ცენტრთან დამაკავშირებელი გზები მოუწესრიგებელია. აქ გადაადგილება უჭირს როგორც ქვეითად მოსიარულეს, ისე ავტომობილს. განსაკუთრებული პრობლემები იქმნება უამინდობის დროს.

უგზოობა ართულებს მოსახლეობის საყოფაცხოვრებო პირობებს. ფერხდება აღნიშნული დასახლებების სოციალურ-ეკონომიკური განვითარება. სოფელი გორდი ტურისტულად მიმზიდველი ლოკაციაა და ყველა ადგილობრივს განვითარების თანაბარი შესაძლებლობა უნდა მიეცეს, შიდასაუზნო საგზაო ინფრასტრუქტურის მოწესრიგება კი ამ მიმართულებით უპირველესი ამოცანაა.

ვინაიდან, ადგილობრივი თვითმმართველობის კოდექსის გათვალისწინებით, შიდა გზების მოწესრიგება თვითმმართველობის საკუთარ უფლებამოსილებას განეკუთვნება, მოგმართავთ თხოვნით, ადგილობრივი თვითმმართველობის კოდექსის შესაბამისად, საკრებულოს სხდომაზე საჯაროდ განიხილეთ აღნიშნული საკითხი, რათა უმოკლეს ვადაში დაკმაყოფილდეს მოსახლეობის მოთხოვნა.

საბავშვო ატრაქციონი სოფელ გორდში

გორდი საკმაოდ მჭიდროდ დასახლებული სოფელია, გარდა ამისა, ქვეყნის ერთ-ერთი ტურისტულად მიმზიდველი ლოკაციაა. სოფელში ბევრი პატარა იზრდება, ზაფხულობით კი ბავშვების რაოდენობა ორმაგდება. აქ მოდიან როგორც დამსვენებლები, ისე ტურისტები. სამწუხაროდ, სოფელში არ არსებობს არცერთი საბავშვო გასართობი ატრაქციონი, რაც თავისთავად პრობლემაა და აქ მცხოვრები პატარები, ქალაქში მცხოვრები ბავშვებისგან განსხვავებით, ამ ელემენტარულ გასართობს მოკლებულები არიან.

ადგილობრივი თვითმმართველობის კოდექსის თანახმად, თვითმმართველობის საკუთარ უფლებამოსილებას განეკუთვნება სკოლამდელი დაწესებულებების ინფრასტრუქტურის მოწყობა-განვითარება, ამიტომ გთხოვთ, საკრებულოს სხდომაზე საჯაროდ განიხილეთ აღნიშნული საკითხი, რათა უმოკლეს ვადაში სოფლის საბავშვო ბაღის ეზოში განთავსდეს საბავშვო ატრაქციონი და დაკმაყოფილდეს მოსახლეობის მოთხოვნა.

← → ↻ 🔒 Not secure | petition.isg.ge/khoni/petitions/view/16

ავსიცი | ხელმოწერები

ქოლინ გიგია

გამოქვეყნებულია: 01.06.2021 18:59 დასრულების თარიღი: 25.06.2021 11:28

120

123

საბავშვო ატრაქციონი სოფელ გორდში

გორდი საკმაოდ მჭიდროდ დასახლებული სოფელია, გარდა ამისა ქვეყნის ერთ-ერთი ტურისტულად მიმზიდველი ლოკაციაა. სოფელში ბევრი პატარა იზრდება, ზაფხულობით კი ბავშვების რაოდენობა ორმაგდება. აქ მოდიან როგორც დამსვენებლები, ისე ტურისტები. სამწუხაროდ, სოფელში არ არსებობს არც ერთი საბავშვო გასართობი ატრაქციონი, რაც თავისთავად პრობლემაა და აქ მცხოვრები პატარები ქალაქში მცხოვრები ბავშვებისგან განსხვავებით ამ ელემენტარულ გასართობს მოკლებულები არიან.

ვინაიდან, ადგილობრივი თვითმმართველობის კოდექსის გათვალისწინებით თვითმმართველობის საკუთარ უფლებამოსილებას განეკუთვნება სკოლამდელი დაწესებულებების ინფრასტრუქტურის მოწყობა-განვითარება, გთხოვთ საკრებულოს სხდომაზე საჯაროდ განიხილეთ აღნიშნული საკითხი, რათა უმოკლეს ვადაში სოფლის საბავშვო ბაღის ეზოში განთავსდეს საბავშვო ატრაქციონი და დაკმაყოფილდეს მოსახლეობის მოთხოვნა.

აღნიშნული პეტიცია, ხონის მუნიციპალიტეტის საკრებულოს ბიუროს 2021 წლის 28 ივნისის სხდომის გადაწყვეტილების და ლონის მუნიციპალიტეტის საკრებულოს დეპუტატის (რეკლამენტი)-ს დამტკიცების შესახებ 2017 წლის 20 ნოემბრის N21 დადგენილების, 125-ე მუხლის მე-2 პუნქტის საფუძველზე გადაგზავნილია ხონის მუნიციპალიტეტის მერიის შუამდგომი რეაგირებისათვის.


შესრულებული პეტიციების ანგარიში აიხსნება მუნიციპალიტეტის ვებ გვერდზე www.khoni.gov.ge

საინფორმაციო კამპანიის პარალელურად, საკრებულოსა და მერიაში მოხდა ადმინისტრირება და მიღწეულ იქნა მზაობა ელექტრონული პეტიციის მიღების, განხილვის და სხვა თანმდევი პროცედურებისათვის. საკრებულოს სხდომაზე მიღებული გადაწყვეტილება ხმის მიმცემთა მინიმალური ზღვარის 0,5% პროცენტით განსაზღვრის შესახებ - 2021 წლის 31 მარტის №4 დადგენილება - ცვლილების სახით შევიდა 2017 წლის 20 ნოემბრის №21 დადგენილებაში (საკრებულოს რეგლამენტი).

ფონდი „სოხუმის“ ორგანიზებით გაიმართა ტრენინგები ადგილობრივი საჯარო მოხელეებისათვის, როგორც საკრებულოს, ისე მერიის თანამშრომლებისათვის. მოწვეულმა კვალიფიციურმა იურისტმა დეტალურად ისაუბრა პეტიციის სამართლებრივ და საკანონმდებლო ასპექტებზე და მიღება-განხილვის პროცედურებზე.



პროექტის ფარგლებში გაიმართა მრგვალი მაგიდა, რომელსაც ადგილობრივი პედაგოგები, საჯარო მოხელეები, ჟურნალისტები, სამოქალაქო სექტორის წარმომადგენლები და მედიკოსები ესწრებოდნენ. მრგვალი მაგიდის სადისკუსიო თემა ელექტრონული პეტიცია და მისი მნიშვნელობა იყო.



შეხვედრებმა სოფლად და ქალაქად, ტრენინგებმა და დისკუსიებმა მნიშვნელოვანწილად გაზარდა პეტიციის, როგორც ჩართულობის მექანიზმის, ცნობადობა და შედეგმაც არ დააყოვნა. მუნიციპალიტეტის ვებგვერდზე 25-ზე მეტი პეტიცია აიტვირთა. ყოველგვარი შეფერხების გარეშე მიმდინარეობდა ინიციატორების რეგისტრაციის, პეტიციების ატვირთვის, ხმის მიცემისა და გადაგზავნის პროცედურები. პეტიციების შინაარსი, ძირითადად, ინფრასტრუქტურულ საკითხებს მოიცავდა. პეტიციათა უმრავლესობამ დადგენილ ვადებში დააგროვა ხმათა საჭირო რაოდენობა და განსახილველად გაეგზავნა საკრებულოს.

პროცესმა გვაჩვენა შედეგები:

1. სამოქალაქო სექტორმა (ამ შემთხვევაში, ფონდი „სოხუმი“, მენარმე ქალთა ფონდი, „სპექტრი“), როგორც დაინტერესებულმა მხარემ, ადგილობრივ ხელისუფლებასთან და ადგილობრივ სამოქალაქო სექტორთან („დევნილთა საინიციატივო ჯგუფი“, „ედელვაისი“, „ახალგაზრდული ჩართულობის ცენტრი“, „ფენიქსი“) ერთად შეძლო მოქალაქეთა გააქტიურება და საკმაოდ საპასუხისმგებლო თანამშრომლობის, თანასაქმიანობის პრაქტიკა შექმნა. რეალურად აამოქმედა მოქალაქეთა ჩართულობის ძალიან ეფექტური მექანიზმი „ელექტრონული პეტიცია“.
2. დაინერგა ელექტრონული აპლიკაცია, რომელიც სავსებით პასუხობს მოთხოვნებს. ძალიან მნიშვნელოვანია, რომ არის მარტივი და ხელმისაწვდომი მექანიზმი ნებისმიერი დაინტერესებული პირისთვის. ასევე მნიშვნელოვანია, რომ ეს არის წინგადადგმული ნაბიჯი ადგილობრივი მმართველობის პროცესში პროექტების, პროგრამებისა და სხვა სერვისების შემდგომი დიფიტილიზაციისათვის.
3. მუნიციპალიტეტში მცხოვრებმა ასობით მოქალაქემ თვითმმართველობის საკითხებთან მიმართებაში მიიღო ძალიან ბევრი ინფორმაცია, ჩაერთო გადანყვეტილების მიღების პროცესში, გახდა მიღებული გადანყვეტილების თანაავტორი და თანაზიარი. შესაბამისად, გაიზარდა მათი მოქალაქეობრივი პასუხისმგებლობა, კომპეტენცია და ა.შ. განსაკუთრებით გააქტიურდნენ მუნიციპალიტეტში მცხოვრები ახალგაზრდები.
4. პროექტის მიმდინარეობის პროცესში გადამზადდნენ და კვალიფიკაცია აიმაღლეს საკრებულოსა და მერიის საზოგადოებასთან ურთიერთობის სპეციალისტებმა.
5. საინიციატივო ჯგუფის წევრთა სახით მუნიციპალიტეტში არიან კომპეტენტური ადამიანები, რომლებიც ელექტრონულ პეტიციასთან დაკავშირებით უწყვეტ რეჟიმში კვალიფიციურ კონსულტაციას გაუწევენ ნებისმიერ დაინტერესებულ პირს.
6. პეტიციის დანერგვას საკმაოდ სერიოზული მედიამხარდაჭერა ჰქონდა: დაიბეჭდა საინფორმაციო ფურცლები, რომლებიც დარიგდა შეხვედრებზე. ყველა აქტივობის შესახებ ინფორმაცია ვრცელდებოდა ფონდი „სოხუმის“ ძირითად და საპროექტო სამენოვან ვებგვერდებზე, ფონდი „სოხუმის“ ძირითად, საპროექტო და ასევე ხონის ადგილობრივი სამოქალაქო საზოგადოების ორგანიზაციების ფეისბუქგვერდებზე. ამ სიახლის შესახებ ადგილობრივ გაზეთ „ხონელში“ 2021 წლის ივლისში დაიბეჭდა ჟურნალისტ გურანდა ცაგურიას სტატია „ელექტრონული პეტიცია ხონის მუნიციპალიტეტში - პროექტი, რომელიც მომავლისაა“. მიჩნეულ იქნა გამორჩეულ პრაქტიკად და მომზადდა პუბლიკაცია ფონდი „სოხუმის“ ძირითადი ვებგვერდის კატეგორიისთვის „წარმატების ისტორია“ <http://fsokhumi.ge/index.php/ka/saqmianoba-ka/warmatebisistoria-ka/item/11280-2021-06-27-15-28-44>. ეს პუბლიკაცია დაიბეჭდა პროექტის ფარგლებში შექმნილ ვებგვერდზეც <https://csoforum.ge/index.php/ka/result-ka/1011-2021-06-27-15-32-27>

დასკვნა

„ელექტრონული პეტიციის“ პრაქტიკაში ამოქმედების პროცესმა დაგვანახა: რაც კანონმდებლობის დონეზე ძალიან ცალსახად და გასაგებად გვაქვს მოცემული, რიგ შემთხვევებში პრაქტიკულ საქმიანობაში მისი იმპლემენტაცია ვერ ან არ ხერხდება. მოსახლეობას არ აქვს ინფორმაცია, ან ფლობს ინფორმაციას, მაგრამ არ აქვს სათანადო მოტივაცია ან უნარ-ჩვევა, რომ იხელმძღვანელოს კანონით. არც ადგილობრივი ხელისუფლების რესურსები არის საკმარისი, რომ ჩართულობის მექანიზმები გახდეს საზოგადოებაში პოპულარული და ამ სიკეთით თანაბრად ისარგებლოს საზოგადოებამ და ხელისუფლებამ.

ასეთ მოცემულობაში არასამთავრობო სექტორი არის ძალიან კარგი რესურსი, საშუალება, პარტნიორი, რომ საუკეთესო პრაქტიკის მაგალითები შეიქმნას, რომ შემდგომში ეს მაგალითები გახდეს სტიმულის, მოტივაციის, ბიძგის მიმცემი და გზამკვლევი თვითმმართველობის რეფორმის კვალდაკვალ განსახორციელებელი პოზიტიური ამოცანების განსახორციელებლად.

წყარო

ფონდი „სოხუმი“ (2021 წლის 25 მაისი), საჯარო მმართველობის რეფორმის (PAR) საგზაო რუკის მონიტორინგი დასავლეთ საქართველოს 8 მუნიციპალიტეტში (მესამე ანგარიში)

ინფორმაციის თავისუფლების განვითარების ინსტიტუტი (2021 წლის 12 მარტი), პეტიციების სისტემის მნიშვნელობა მოქალაქეთა მონაწილეობისთვის: საერთაშორისო მაგალითები და საქართველოს პრაქტიკა. თბილისი, ხელმისაწვდომია ბმულზე <https://idfi.ge/ge/the-importance-of-petition-systems-for-citizen-participation->

საქართველოს საკანონმდებლო მაცნე (2014 წლის 5 თებერვალი), ადგილობრივი თვითმმართველობის კოდექსი, თბილისი



კულტურულ-ჰუმანიტარული ფონდი „სოხუმი“

პროექტის დირექტორი:

ალლა გამახარია

კულტურულ-ჰუმანიტარული ფონდი „სოხუმი“

პროექტის კოორდინატორები:

თეა თორინაძე

კულტურულ-ჰუმანიტარული ფონდი „სოხუმი“

მერი გელაშვილი

მენარმე ქალთა ფონდი

ქეთევან ცხაკაია

იმერეთის მხარის მეცნიერთა კავშირი „სპექტრი“

რედაქტორი - ლალი შენგელია

დამკაბადონებელი - ლია კოსტავა

მისამართები:

ქ. ქუთაისი, მაგლობლიშვილის ქ. 6

ქ. თბილისი, ა. მიცკევიჩის ქ. №29 ბ, საოფისე ფართი №2

ელფოსტა:

womansukhumi@gmail.com;

fundsukhumitbilisi@gmail.com

ვებგვერდები:

www.fsokhumi.ge

<https://csoforum.ge/>

ფეისბუქგვერდები:

www.facebook.com/fsokhumi

<https://www.facebook.com/CSOForum.FS>